



MARA EVANGELICAL CHURCH

VACHHUH

MONTHLY NEWSLETTER



Volume 28

Monthly Newsletters

January 1/2021

Editorial

Chyhsapa achhuahna cha tlah tyhta, Khazohpa achhuahna deikua hla a tloh tyh taupa he 2020 Krismas nata 2021 Kôthiepa daihti lia a vaw ki ngasa. Covid-19 vâta Krisma nata Kôthieh kychhi he yru achhi kaw awpa ta eima rohpadya zy cha maohpyu khai hawta, khâpa hmâta pakhâ thei leipa, alyna, thaphana ta Local to lia abie thlaha. Sawhkha ta sikulzy a khaw vâta khihto ta satlia laisa aki kaw eita, hawti nawhzy chhao ama ly ngasa chyupa ta Krisma nata kôthieh kychhi he atlâpa ta eima vaw pachha chy.

Kôthiepa kychhi liata thokha Localzy cha sâ hluphi ama kâ vâta Krisma nata kôthie kychhi he a pazaopa ama y hra. He hawta Khazohpa kychhi liata Khazohpa ano tlaita â vaw parônasana heta hnabeiseina thiepa miah pahneisa. Kô hropazy hlata a vâ opy eima râh lia a vaw pahy awpa he thla eima vaw chha chy aw. Krisma nata kôthieh daihti liata adyhna nata pathaihna taupa bie piepa eima hmâ. Khazohpa ta a bie lia a a phualuah hmeiseih. Adyhna nata Pathaihna liata eima y theina awpa châta eima râh zydua he ahrâna pipa he Khazohpa la liata hiah ei su u. Khazohpa ta avâ opyzy miah pahypa sala, thlâpa la byhnâ khasia tia leina taihta miah pie mawh sy.

Parah Local Krisma

Rev. Dr. L.B. Siana (General Secretary) he Pârah Biatuhpa ta chakaona a vaw ngia hmiatua chai vâta tlyma, atakô Krisma he hruapa a vaw châ. Noh (3) chhôn hlâ nata bie ta ahmâ chaimai pita thyutliazy tiama kaw eita aparipa chhao hmôpa y va ei. Music lâ he ei (3) tlai vaw tlâ ta eima ly ngaita kaw. Local Awnanopazy ta a eih hropa ta vao (4) ta na ly eita, Krisma apaltohtuhpa Rekhai paw chhao vao so (5)pa ta miah ama ly.

Mala (A) Local nôpawzy chhao a vaw paliena lâta vaw âh heih eita no (1) ahmâ kheih heih, Krisma bie pipa “Adyhna Beipa” taupa he hmopha taona ta chhopsia eita, Mala nata Pâra likawh bike lapi Tisi vâ tai ameitalu khai ta ama za tao. Parah local chhao Tisi va tai bike Lapi eima za parai hra aw taupa ama reipa

thâti eima thei. General Secretary Krisma ahmâpa vâta tlyma. Kôthiepa tihâh châta Ngaicha (7), Zunaipa (1) sakhih (1) nata azy (1) zydua sahrau ta kôthiepa ama hmâ taupa thâti eima dao.

Moderator ta Taubu Jubilee â hla

Khichhôn Châhvâ Biehai achuna he 1969 tawhta Taubu Local Awnanopazy he vaw hnei eita Kôkha chhao pahmei leita 2019 taih, Kô 50 ama vaw tlo haw. A jubilee kychhi he adaihti lia ama tao thei lei vâta December 29-30, 2020 liata taopa châ ta, Moderator Rev. Victor Ve u a hla thei ei.

Taubu nata Chakhai khih likaw, tlâ padâ pha ngasapa lia Jubilee lôbô châta Kross to bô eita, khichhôn châhvâ Biehai achuna, a vaw pathao tua penawh hry liata atanoh taihta a hroh pathluapa Pawhrapa Ngolepaw nata Sôleipawzy chhao palyupalihna ama hnei. 1969 daihti liata Hyutuhpa a vaw chakaopa Machâ Nawtuh sawnawhzy ta Lôbô châta hryunazy he a vaw tôh eita, khisaw zydua ama chô liata Khazohpa liata ama ly hmeisei.

Pro. P. Beirahua nata Aru local

MEC Moderator Rev. Victor Ve U ta Pro. P Beirahua cha Aru Local liata ypa ta chakao awpa a châpa vâta a chhitha. December 20, 2020 liata thlachhâna ahneipa ta, Local Awnanopazy ta Krisma lyma eima hmôpa a châ, tah eita, ama ly ngâsâ. Ama Pastor chhao he eima theina hawta mohoh pha awpa ta Moderator hnohta chho eita, Pastor a vaw papua theipa Rari Local nata Pastor chhônkhâ lâ liata January (3) Sunday liata alyna bie chhao ama hlâ. Pastor he Khazohpa tawhta eima hmôpa lyma a châ vâta deichhy pha awpa chhao apeimawh zie miah ama pahmôsa kaw.

Lialaipi liata Krisma nata Kôthie zizâ

December athaona tawhta Krisma ziza cha rô pahâ kawpa ta khihpi lia a pathli pathao. Sawhkha molaipazy, Awnanopa nata NGO phupyzy, KTP nata KHP sahlaozy ta khihpi chheipa tlâpadâ phapazy lia Krisma ahmâ chaimai eita, Krisma reithaina pyuta

abie thla haw. Pheisai mawtaw asyu aza ta kaw tlô ta, pheisai he asâh ta ama kaw tlô. Myanmar Vice President Henry Vathio chhao a kaw tlôpa chhao ta, Krisma ziza padia thei tia ra va ei. Pheisai beizy tlai chhao Krisma lia thâtihpha a reituhpa lâta tloa ama y haw.

L. Station cha Machâ Beilehniepaw patlô ta Lialaipi (Vaihipi) nata Lialaipi (A) Local Odyh 400 hlei zydua chata Pupa Ngosapepaw ta, Naw (2), Seih (1) nata seih tipa vao (2) ta a khihi châta a tao. Thyutlia nata hawtazy Khazohpa bie nata hla liata ama pahâ ngasa. Krisma khai tawh, chhôtô thlahchha chakaona ta kawhlâ heih eita kôthiehpâ noh cha thina kyhchhi lata a vaw lie haw. January 1-4 likawh lia chyhsa mo (3) khizaw vaw khô haw eita, eima lynazy cha rikiahna liata achei chy heih pita Krisma nata kôthieh eima lyna cha thina chhao miah pakha thei leita eima ly pazao thei lyma. KTP sahlao zydua 241zy ta Kavi leita kôthie khaita thlah chha heih eita, Khazohpa liata eima ly hmeisei. Lialaipi Town liata Krisma nata Kôthieh eima lyna cha khizaw nata Covid-19 pakha thei khao vei. Haleluiah.

Administrative & Ministerial Committee

Dec 9, 2020 noh ta AMC meeting hneipa a châ. AMC meeting ta 2020-2024 term châta atlypatlohpa Home Evangelistzy pa-ihna nata Bihrai a kawpa tlôpa St. Beirahrua chhao Probation Pastor ta pa-ina a hnei. Pro. P. Beirahrua cha Aru local liata Associate Biatuhpa ta su piepa a châ.

Department Central Conference zy thâtih reipa chata Covid-19 hriiah vâta zawpi apahmaopa pasaipa a châ leipa vâta Sunday hmâ leipa ta noh kha dei ryureina hnei awpa ta paryhsapa a châ. Chavâta department ryureina zydua cha daihti pathlaipa a châ khai haw.

1. KHP CC Ryureina tlôpaki noh Jan. 14 (Thu), ryureina noh 15 (Fri), pai noh 16 (Sat) châ aw ta, a su cha Rari local a châ.
2. KNP: CC cha Lailenpi vaihipi local Church lâta su pathlaipa a châ.
3. KTP CC Ryureina tlôpaki noh Jan. 21 (Thu), ryureina noh 22 (Fri), Painoh 23 (Sat) a châ. A su cha Lelai châ khao leipa ta, Immanuel Local a châ.

Myanmar Vice President Lialaipi a kaw tlô

Dec. 22 noh ta V.P Henry Vathio cha, Lialaipi Airport raihriazy a kaw moh. Chin State Chief Minister chhao a vaw tlô hra. Dawlei nata Ngephepi likaw Beinô hleidy, Sôsai khih chapiapa ta Lialaipi-Matupi Mawtaw Lâthlôh nata Lialaipi khichhôn lathlôh 2 mile hiapazy he hlao eima tloh. March thlah

airport pahyna daihti ei khy hei aw tahpa ta rei ta, Helicopter ta Naypyitaw lâta a palie haw.

Eima ly khei kaw

Marasaw Saya Elaisa Vahnie ta USA liata a paduapa BACI nata Machâ M. Vahnei ta a hneipa CICD phupy tawhta Salyutlahna nata Mizâh liata chariah vâta râpaipazy hnota, nie nata do, abu asai châta tei 100 hlei mâpa baona ama pie theipa vâta eima Awnanopa ta thata eima lykhei.

MEC, TSD & HHM jointly retreat hnei

Mararah liata hmasiena raihria awpa ta MEC, HHM nata TSD zy hmaohkha ta hmâhlapa a châ. Kô chhôn ta raihraiipy hlaotlona hneipa a châpa hawhta eima kaona zy thatloh via lymâ thei nawpa ta retreat hneipa a châ. Chakaona su nanopa liata a ypa eima châ pa hawhta su nanopa chy tawhta Dec. 18-19, 2020 noh liata Lôseih tlâh lâta retreat siepa a châ. He akaona retreat liata eima theipa bie zy nata daihti sôhpa hnei khohna he ta hmiala eima chakaona châta pachâna thiehpâ, thatlôna thiehpâ nata akaona phapa miah pahneisa.



December thla miah pahasaipa zy

1. Pinô Chehie (Nodie nô, kô- 87), Hloma- Lailenpi (A) cha chhâpalôpa ta 7/ 12/ 2020 noh liata miah paha sai haw.
2. Pinô Thluamai (Laina nô, Kô-83), Sabawngpi cha 14/ 12/ 2020 noh liata miah paha sai haw.
3. Ht. Sichho, kô- 15, Chali cha Yangon liata 15/12/ 2020 noh liata miah paha sai haw.
4. Pinô Dawmâ nô New Chakhai cha 15/ 12/ 2020 noh liata miah paha sai haw.
5. St.Ngôhmôsa @ Aung Thu, Sabypi cha Yangon thohna o liata 20/ 12/ 2020 noh liata a paha.
6. Saya Beithie (Nei Aung paw), Kô- 40, Lailenpi cha Pyi Oo Lwin thohna o liata 1/1/ 2021 noh liata miah pahasai haw.
7. Pinô Dai Ah (Saya Ramao nô), kô – 87, Lailenpi cha 31/ 12/ 2020 noh liata miah pahasai haw.
8. Pupa Laokô (Chhane paw), kô- 95, Teina-Lailenpi cha 3/ 1/ 2021 noh liata miah pahasai haw.

9. Saya Le-U Dawlei kihpa Saya Haokô nawtapa cha. Siaha college vaih lia High Sikul pachutuhpa cha, Jan 5 liata Aizawl liata miah a paha sai haw.

2020 kô Krismas hmâna thâtih

Kô chhôn Covid- 19 hriiah vâta zawpi apakhyna zy vangâsapa ta eima vaw yna zy tawhta 2020 Krismas daihti tlô eima ngiatiah leipa cha aly lei thei awpa cha vei. He daihti eima vaw tlô tita chhônkha sanawh rino vâ pi ta atyh awpa chhao a ngiatiah mapi. Local to ta Krismas alyna kychhah achhuadypa zy chhao ama hlu kaw tahpa thâtih zy vâta eima ly hmeisei. Chavâta thokha local zy cha Head Office liata awnanopa nôpaw zy hruapa ta ahma awpa a châ. Rev. Dr. L. B. Siama chhônkha cha Para local, Rev. Victor Ve u cha Chakhai local nata Rev. Satu Ve u cha Tisi local zy lâta hrua pa ama châ.

Pro. P. Bielehmo dychâ khophei a kiah haw

Pro. P. Bielehmo nata Ls Ngun Khin cha Dec 17 noh ta Thatla local Church liata “hro chhôn ta ei cha hnei lyma, aw tahpa ngâchhahna bie ama taih haw. Thata eima lykhei. Khazohpa ta chhônkha thiehpâ ama paduana liata saw byhna zy pie sala, ama chakaona liata chhao akaona chôta ama deichhy lyma thei awpa he eima thlahchhana a châ.



Lialaipi KTP Bia Kavilei thlahchhana

Jan 3, 2021 (Sun) noh ta Lialaipi Bia KTP zy pachhuahpanohpa ta Lialaipi kihpi, Health and Hope Myanmar ta a hneipa Multipurpose Training Hall liata Kavilei ta thlahchhana program hneipa a châ.

Kavilei thlahchhana program liata MEC nôpawzy, biatuhpa, Hyutuhpazy chhao ama hlao. Lialaipi thyutlia hryta KTP local (3), MTP, MSA, ULP, YFL tawhta nopawzy nata sahlao zy, maluh ta 233 he program liata ama hlao. “Pathaihna lathlôh (Isai 35:8)” tahpa biepipa hmâpa ta my dawh 8:00 tawhta za la 4:00 taih ta program ahmana ama hnei..

Program he section-3 ta pachhah a cha. Chairpersons ta Mch. Abiza nata K. Dr. Beichôtha zy

ama cha. Section 1 liata thlahchhana program hmiapa hnosana, thlahchhana iepipa (47) zy reina nata Rev. Dr. Zodau tawhta biereina a hnei. Section-2 liata Rev. Dr. L. B. Siama (GS) biereina nata Rev. Satu Ve U chhithhapa ta zawpi thlahchhana group-7 pachhahpa ta hneipa a châ. Section-3 liata Rev. Victor Ve U biereina hnei khao tawhta zawpi ahlana cha Senior Pastor Rev. Haidau chhithhapa ta hneipa a châ. ABeipa ta he ama hmâna he byhna thata a piepa ta pahnopâ a châ.

KHP Sunda ahmâna

Dec. 6, 2020 noh he KHP Noh ta hmâpa a châ. Local to liata zawpi ta apahmaoh ta hmâ thai awpa a châ leipa chhao ta ryhpaona chy lymâ hawhta rôhna kawpa ta KHP noh a hmâthei chyupa a châ. Carol akhiehpâ chhao thokha local zy hnei ei ta, thokha local zy deikua Châbyh raipa ta amâ hmâpa thâtih eima thei. KHP luhpazy nata sahlao zy tiama kawpa ta ama chakaona he ta ta eima awnanopa chata byhna a châ hmeiseipa vâta eima ly kaw.

PAHNOSANA

1. Ei (50)na MEC Assembly cha March 4 noh tlôpakipa ta Ma U local church liata tao awpa châ taraw ta, Sawhkhâ tawhta chyhsa hluhpi apahmaoh awpa pasai leina vâta atakô 2021 kô liata Assembly tao khao mah lei awpa ta chalihsa chypa a châ. Chavâta Ma U local church ta Assembly a vaw pahawpa he atlahpa ta y si ta, 2022 liata hnei awpa a châ aw.
2. 2021 Assembly a y khao lei awpa vâta Assembly byuhpa ta Assembly Executive Committee Meeting hneipa a châ aw. Kô hropa liata Assembly hlâta EC meeting tao tyhpa kha y leipa aw ta, Assembly noh a châpa March 4, 2021 tlôpakipa ta Assembly EC Meeting taopa a châ aw. Asu cha Sabawngpi local church a châ aw.
3. Assembly ry liata Meeting hruana zydua papua khaipa a châ haw. Local church thokha tlyma, member thokha tlyma, meeting hruana nama hmô pathlei leipa a châ khahta cha, a ry liata palasapa hawhta meeting noh, thlah palasapa hawhta nama vaw tlô awpa ta pahnosapa nama châ.

Meeting	Tlôpaki noh	Meeting noh	Asu
Local Audit		Jan 15-16	Local to
KHP: CC	Jan 14 (Thu)	Jan 15 (Fri)	Rari local
Social Concern	Jan 16 (Sat)	Jan 18 (Mon)	SBP
Education	Jan 18 (Mon)	Jan 19 (Tue)	SBP
Pastoral	Jan 19 (Tue)	Jan 20-21	SBP

SDD	Jan 21 (Thu)	Jan 22 (Fri)	SBP
KTP: CC	Jan 21 (Thu)	Jan 22 (Fri)	Immanuel
Mission	Jan 26 (Tue)	Jan 27-28	LLP
KNP: CC	Jan 28 (Thu)	Jan 29 (Fri)	LLP
Internal Audit	Jan 28 (Thu)	Jan 29-30	LLP
Audit	Feb. 1 (Mon)	Feb. 1-5	LLP
Finance	Feb. 9 (Tue)	Feb. 10 (Wed)	LLP
AMC	Feb. 10 (Wed)	Feb. 11-12	LLP
Assembly EC	March 4 (Thu)	March 5-7	SBP

Hlabu, Biehraie chalei theipa a châ

MEC Office liata a ry liata palasapa châbuzy chalei theipa a châ. Rei leipa liata a chhâ awpa vâta thlai vaw chalei muh vy.

Châbu	Bu kha	Zie
Mara Holy Bible	Zipper 1	10000
Mara Holy Bible	Zipper leipa	5000
Krizyha Hlabu	Solfa	4500
Hlathieha Bu	Bu kha ta	1000
Five Years in Unknow Jungle (Kô 5 chhôn R. A. Lorrain ta Mararah liata a chakaona thatih)	Marareih	2000
Chhônkhâ Thlahchhna Bu	Office vaw	1000
Church Calendar	tlô mah vei	500

Chhônkhâ Thlahchhana Chhinhthana Bu nata Calendar chhao copy 500 chyua pataosa baichhipa châ ta January chhâna liata Lialaipi Office a vaw tlô aw.

ECM Pastor Rev. MC. Zahluna eima pathlie (Kô 63)

ECM Pastor Rev. Zahluna (Chiazipaw) cha eima pasai leina chô ta, Jan 3 (Sun) noh ta Abeipa lâta miah a paha sai haw. Ano he Chheihluh khih liata a piha châ ta, a paw he Chheihluh khih liata Krizyh tua chaipa a châ. ECM Awnanopa liata pastor ta a chakaopa châ ta, cancer pasana vâta MGC hospital liata a paha ta, a ri cha a paliaritlona Chheihluh khih liata pasopa a châ. He hawhta ECM pastor eima kho ngaitapa miah a pahasai pa vâta MEC awnanopa chhao thata eima taokhei. A siasai pa chhônkhâ nata awnanopazy hnohta ABeipa ta thlalôhna a pie thei awpa ta thlahchha eima bao.



Covid-19 chhôn Awnanopa atyuduana

2021 January taih heta eima râh liata Covid-19 hriiah pai mah vei. Hri aveihpazy chhao eima Mararah miah ama hnia va ngaba. Chavâta eima local church to heta asosi ngaitapa nata yzie thai kawpata zawpi eima tyudua awpa ta pasyuna eima cha hnei.

Krismas naga Kôthieha daihti liata zawpi eima hmâpa hawhta zawpi eima tyudua lei awpa a châ aw. Avai thaina he Awnanopa taozie awpa a châpa vâta eima Sawkhâ tawhta pasaina y hla viata chhao local church heta atyudua thai awpa ta eima chakao chyua awpa ta eima pahnosapa a châ.

Pathaiha Lâthlôh

2021 Kôthieha biepipa cha 'Pathaiha Lâthlôh' (Isai 35:8) a châ. He biepipa he kô kha chhôn eima siena liata eima pachâ awpa nata hrokhei chyua awpa eima chhuah aw.

Pathaiha hnawh cha Khazohpa a châ. Theithai 11:44 liata "Keima ei pathaiha hawhta nâmo chhao nama pathaih awpa a châ" Khazohpa ta a tah. Atano Awnanopa châta Pathaiha Lâthlôh eima hneipa cha Zisu Krista a châ. Bei Zisu ta "Kei he Lâthlôh nata hmeiseihna nata hrona ei châ" (Zhn 14:6) a châ. Pathaih thei nawpa ta cha Zisu nata a bie liata eima y awpa abyuh.

Isai 35:1-9 taihta eima moh khiahta cha, cha Pathaiha Lâthlôh liata a sie awpazy cha:

1. Hnabeiseihna a hneipazy ama châ (35:1-3).
2. Atlah leipazy patlana lâthlôh a châ (35:3-6)
3. Hrona ti ama chhôn liata a vaw puana lâthlôh a châ (35:7; Zhn. 37-39).
4. Pathaiha Lâthlôh liata apachisana y vei, chyhsa to thlahlôpa ta pa ysana lâthlôh a châ (35:9).
5. Chatlaipazy deita ta cha liata ama sie aw. Krista a hneipazy deita ta Pathaiha Lâthlôh liata ama sie thei aw.

Kôthieha Byhna

Sabyhi High School liata pachutuh awpa ta eima hruapa Pegu Region tawhtapa Sayama Daw Khin Yin Way cha Sabyhi a vaw tlô tawhta Zisu Krista cha Abeipa nata Pachhatuhpa châta âpypa vâta atakô 2021 January 3 noh ta Bati a châ haw. He sayama nô cha Pathaiha Lâthlôh liata â vaw chhah hawpa vâta ABeipa lâta lyna bie hlâna chô ta, thlahchha bao chyua ei suh vy.

Kôthieha bietapa

"2021 he Ngiapâna nata kyhpachâna poh-o eima kawhpa ta Khazohpa nata vaihzy chhao ta a chaopa ta eima siena kô châ mawh sy" (Rev. Maiki)